

四庫全書

史部

欽定四庫全書

史部

明宮史

上諭

卷二

詳校官監察御史劉芬

編修臣程嘉謨覆勘

總校官中允銜王燕緒

校對官編修臣邱庭澂

謄錄監生臣陳煜

乾隆四十七年四月十七日内閣奉

上諭昨於養心殿存貯各書內檢有明朝宮史一書其中分類敘述宮殿樓臺及四時服食宴樂并內監職掌宮闈瑣屑之事卷首稱蘆城赤隱呂毖較次其文義猥鄙本無足觀蓋明季寺人所為原不堪採登冊府特是有明一代批政多端總因閹寺擅權交通執政如王振劉瑾魏忠賢之流俱以司禮監秉筆生殺予奪任所欲為遂致阿柄下移乾綱不振每閱明代

宦官流毒事蹟殊堪痛恨即如此書中所稱司禮監掌印秉筆等竟有秩尊視元輔權重視總憲之語以朝廷大政付之刑餘俾若輩得以妄竊國柄奔走天下卒之流寇四起社稷為墟伊誰之咎乎著將此書交該總裁等照依原本抄入四庫全書以見前明之敗亡實由於宮監之肆橫則其書不足錄而考鏡得失未始不可藉此以為千百世殷鑒並將此旨錄冠簡端欽此

欽定四庫全書

史部十三

明宮史

政書類二 儀制之屬

提要

臣等謹案明宮史五卷舊本題蘆城亦隱呂

毖校次毖始末未詳考明末有呂毖字貞九
吳縣人嘗撰事原初畧三十四卷序題崇禎
甲申姓名時代皆相合疑即其人然州茅之
士何由得詳記禁庭事殆不可解毋乃奄人

知文義者所私記寔依附其門為之編錄故
不稱撰述而稱校次歟其書敘述當時宮殿
樓臺服食宴樂及宮闈諸雜事大抵冗碎猥
鄙不足據為典要至於內監職掌條內稱司
禮監掌印秉筆秩尊視元輔權重視總憲云
云尤為悖妄蓋歷代奄寺之權惟明為最重
歷代奄寺之禍亦惟明為最深二百餘年之
中盜持魁柄濁亂朝綱卒至於宗社郊墟生

靈塗戾實為漢唐宋元所未有迨其未造久
假不歸視威福自專如其固有遂肆無忌憚
筆之於書故迹其致亡之道雖亦多端要以
寵任貂璫為病本之所在也我

朝自

列聖以來

家法森嚴內豎不過供灑掃或違律令必正刑章不
待於遠引周官委權冢宰而

乾綱獨握

宮掖肅清已足垂法於萬世乃猶防微杜漸

慮遠思深

特命繕錄斯編登諸冊府著前代亂亡之所自以
昭示無窮伏考尚書有曰殷鑒不遠在夏后
之世詩大雅有曰儀鑒于殷亦越漢之高帝
使陸賈作新語亦曰著秦之所以失與我之
所以得蓋時代彌近資考鏡者彌切也

皇上於

內殿叢編檢逢是帙闢其繆而仍存之

聖人之所見者大矣謹恭錄

諭旨弁冕簡端仰見衡鑒

親操折衷衆論勒千古未有之鴻編皆義主勸懲
言資法戒非徒以雕華浮艷為葺弄之富也
乾隆四十七年十一月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

明宮史卷一

明 呂毖 撰

宮殿規制

皇城外層向南者曰大明門與正陽門永定門相對者也稍北過公生左門而向東者曰長安左門再東過玉河橋自十王府西夾道往北向東者曰東安門轉而過天師菴草場轉西向北曰北安門即俗稱厚載門是也

轉而過太平倉迤南向西曰西安門再南過靈濟宮灰
廠向西曰長安右門紅柵之內門之北則登聞鼓院在
焉此外圍之六門牆外周圍紅舖七十二處

紫禁城外向南第一重曰承天之門每年霜降後吏部
等衙門朝審刑部重囚在門前中甬道之西東西甬道
之南五府等衙門坐東向西吏部等衙門坐西朝東吏
部主筆者第一座刑部正堂第二座都察院第三座餘
以次列之南二重曰端門三重曰午門魏闕西分曰左

掖門曰右掖門轉而向東曰東華門向西曰西華門向北曰玄武門此內圍之八門也牆外周圍紅鋪三十六處每晚有勲臣一員在門左門內直宿每更官軍提銅鈴巡之而護城之河遶焉

皇城內自北安門裏街東曰黃瓦東門門之東街南曰尚衣監街北曰司設監再東曰酒醋麪局曰內織染局曰皮房紙房曰針工局巾帽局曰火藥局即兵仗局之軍器庫也再東稍南曰內府供用庫曰番經廠曰道經

殿曰司苑局曰鐘鼓司再南曰新房曰都知監曰司禮
監司禮監第一層門向西與新房之門一樣門之內稍
南有松樹十餘株者內書堂也先師位供安向南其楹
聯曰學未到孔聖門牆須努力儻行幾步了不盡家庭
事業且開懷丟在一邊聖人位之北一間則內書堂教
書詞林先生講憩之所也廚房設在後凡米肉食料俱
取辦于光祿寺內書堂稍北曰崇聖堂再北向南者則
二層門矣入此門再東朝南者斯本監公廳之大門也

門外有東西二井遞封汲之西井之西一小門東井之東一小門其內皆提督監官典簿文書房掌司所居房屋也古書籍名畫筆墨綾紗紙劄各有庫貯焉新房之北司禮監也新房之南御馬監也所謂新房者東西一街南北一連二連三連等連連之十字路口各有井御馬監之南向西者曰杆子房曰北膳房曰暖閣廠之東門可通河而西門最高大啟閉不便遂于大門扇上復開一小門以便行走河之西岸榆柳成行花畦分列如

田家也曰南膳房再南曰冥器廠曰混堂司曰內東廠
曰尚膳監撥子斜對御馬監向東者曰北花房亦辦膳
之所也曰印綬監曰中書房曰蹴圓亭

武廟恒
臨幸之

曰內承

運庫此庫掌印僉書掌司寫字諸人所住之署也此路
總名之曰東河邊尚有房八區則司禮監秉筆隨堂衆
住所謂河邊直房是也過東上北門東中門街北曰彈
子房曰學醫讀書處曰光祿寺街南曰篋頭房再東則
東安門裏俗所稱牆門者過橋則東安門也自東至南

門之東曰重華宮其前曰重華門曰廣愛門曰咸熙門
曰肅雍門曰和熙門猶乾清宮之制而後有兩井東西
有兩長街西長街則有興善門麗京門長春門清華門
寧福宮嘉福宮明德宮永春宮永寧宮延禧宮延春宮
宜春宮今為停喪之所凡妃嬪皇子皇女之喪皆于此
停靈至發引時出東上南門東上北門北中門北安門
詣西山等處墳園安厝東長街則有廣順門中和門景
華門宣明門景明門洪慶門洪慶殿供番佛之所也又

有膳房又有門曰景和門又東則內承運庫藏也自東上南門迤南街東曰永泰門門之內街北則重華宮之前門也其東有一小臺臺上有一小亭再東南則崇質殿俗云黑瓦殿是也

景泰間英廟自北狩回所居永泰門

再南街東則皇

史宬珍藏太祖以來御筆實錄要緊典籍石室金櫃之書此其處也皇史宬每年六月初六日奏知曬晾司禮監第一員監官提督董其事而稽覈之其看守則監工也左右小門曰鱣

音龍

歷左門曰鱣歷右門再東則

追先閣欽天閣透玲碑在焉世廟御製欽天頌勒于碑
碑石光潤近似卧碑制也再南則御前作也

皇史宬之西過觀心殿射箭處稍南有門曰蒼龍其南
則昭明門其西南則嘉樂館也其北曰丹鳳門門列金
獅二內有正殿曰龍德左殿曰崇仁右殿曰廣智正殿
殿後則飛虹橋也橋以白石為之鑿獅龍鼉黿魚蝦海
獸水波洶湧活躍如生云是三寶太監鄭和自西域得
之非中國石工所能製者橋之前右邊一塊缺損云是

中國補造屢易屢泐亦古跡也橋之南北有坊二曰飛虹曰戴鼉姜立網筆也橋之東西有天光雲影二亭又北疊石為山山下有洞額曰秀巖以磴道分而上之其高高在上者乾運殿也左右各聳一亭曰凌虛曰御風隔以山石藤蘿花卉若牆壁焉又後為永明殿最後為圓殿引流水遶之曰環碧又再東曰玉芝宮後殿曰大德殿外券門曰寶慶門曰延祥門曰佳麗門其東牆外則觀心殿也自皇史宬東南有門通河河上曰湧福閣

舊名澄輝閣俗所謂騎馬樓者是也迤東沿河轉北則
呂梁洪則東安橋再北有亭居橋上曰涵碧又北則回
龍觀在焉其殿曰崇德者是也觀多海棠每至春深盛
開之時聖駕多臨幸之是河也從北安門外文昌宮迤
東步糧橋入經皮房內織染局巾帽局御馬監之東東
安門橋下至長安左門外迤東之玉河橋出焉北安門
內街東曰安樂堂凡內官有疾者送此調理山陵及外
廠九門官則不送也再南黃瓦西門之裏則內官監也

過北中門迤西則白石橋萬洪殿等殿至大高玄殿則
習學道經內官之所居也其北則裏水甯也北中門之
南曰壽星殿左曰毓秀館右曰育芳亭後曰萬福閣其
上曰臻福堂曰永禧閣其下曰聚仙室曰延寧閣曰北
果園殿之西門內有樹一株掛鐵鑄雲板因年久樹長
遂銜雲版于樹榦之內止露十之三誠古跡也殿之東
曰永壽殿曰觀花殿植牡丹芍藥甚多曰集芳亭曰會
景亭曰翫春樓其下曰壽安室曰觀德殿亦射箭處也

與御馬監西門相對乃壽皇殿之東房萬厯中年始開者殿之南則萬歲山俗所謂煤山者此也

故老云土查堆築而成崇

積已巳冬大京兆疏亦曾誤指為有煤

山下樹木葱鬱鶴鹿成羣呦呦之

鳴與在陰之和互相喚發可並聞于霄漢間上有一成磴道每重陽日聖駕在山頂陞座可遙望靡涯矣山之門曰萬歲門再南曰北上門左曰北上東門右曰北上西門西可望乾明門東可望御馬監也再南過北上門則紫禁城之玄武門也

此上西門之西大高玄殿也其前門曰始青道境左右

有牌坊二座曰先天明鏡曰太極仙林曰孔綏皇祚曰

弘祐天民又有閣二座左曰炁

呼如陽

明閣右曰相

呼如陰

靈軒內曰福靜門曰康生門曰高玄門曰蒼精門曰黃

華門殿之東北曰無上閣其下曰龍章鳳篆曰始陽齋

曰象一宮所供象一帝君範金為之高尺許乃世廟玄

修之御容也稍西曰石作曰圓明閣又西曰乾明門門

裏迤南曰兵仗局曰西值房即尚衣監所屬之袍房也

曰舊監庫屬內官監地方曰尚膳外監曰甜食房曰西
上北門其東向北者則西下馬門矣

紫禁城護城河一帶其東有內承運庫衙門起至北花
房止西岸有矮河牆羅列石作物料其東北角西北角
有澡馬河礮礮石柵

自西北上門過西上南門向東則御用監也又南向西
則銀作局也再南過橋向南者曰靈臺亦有觀象臺銅
鑄渾天儀以測星度觀雲氣焉沿河西岸而南者曰寶

鈔司自西中門之西則尚寶監也鷹房司也屬尚監再
西出西苑門迤南向東曰灰池曰水碓水磨河之西土
坡之上曰昭和殿曰擁翠宮曰趵臺坡曰澄淵亭又北
曰紫光閣再西曰萬壽宮曰壽源宮嘉靖四十四年春
更曰百祿宮曰五福殿曰承祐殿左祐祥殿右祐寧殿
曰龍吉齋曰鳳祥館曰昭祥閣曰朗瑞居曰耀曦門曰
耀朗門曰含祥門曰成瑞門曰永和門曰永順門曰永
綏門曰永祉門曰納康門曰長寧門曰凝一殿其東曰

萬春宮曰含春殿曰萬和宮曰萬華宮曰萬寧宮曰御
饌庖曰體仁門曰履康門曰啟泰門曰納福門曰泰安
門其西曰仙禧宮曰仙樂宮曰仙安宮曰仙明宮其朝
東南起有門廿一曰常寧曰常和曰常善曰常耀曰金
寧曰攸順曰攸利曰金靜曰金瑞曰宣惠曰靜安曰素
康曰灌木曰金寧即授衣曰常靜曰壽安曰康成曰東
和其南曰陽德曰永光曰嘉安其東曰柏木殿曰旋坡
臺即兔兒山顯揚殿也曰迎仙亭牌坊二南曰福巒北

曰祿渚臺上七層牌額曰玉光曰光華曰華耀曰耀真
曰真境曰境仙曰仙臺曰朝元館曰景德殿曰大光明
殿曰登豐門曰廣福門曰太始殿曰太初殿曰宣恩亭
曰饗社亭曰一陽亭曰萬仙亭後曰永吉門曰左安門
曰右安門曰太極殿曰統宗殿曰總道殿曰天元閣下
曰闡玄保祚朝東外二門曰天平曰豐和曰無逸殿曰
幽風亭曰落成殿金海石橋之北河之西岸向南曰玉
熙宮曰承華殿即迎翠殿曰寶月亭曰芙蓉亭曰清馥

殿曰丹馨殿曰錦芳亭曰翠芬亭曰長春門曰昭馨門
曰端芬門曰馥景門曰仙芳門曰馥東門曰馥西門曰
澄碧亭曰騰波亭曰飛靄亭曰騰禧殿即黑老婆殿也
曰王媽媽井河之上游倒影入水如城闕龍宮者曰乾
德殿即俗所云北臺是也高八丈一尺廣十七丈磴道
三分三合而上之萬厯二十九年夏建乾清宮牌子朝
中內官監總理陳永壽董其役至天啟元年十一月十
四日奉旨折毀平之天啟四年夏就其處為嘉豫殿其

門曰迎涼門牌坊南曰福渚北曰壽岳河中有亭五中
曰龍澤左曰澄祥右曰湧瑞左曰滋香右曰浮翠總謂
之曰五龍亭也又洞三上曰龍壽中曰玉華下曰遊仙
已上俱萬厯三十年秋添其三洞至天啟元年冬拆再
西則內教場也曰振武殿曰恒裕倉曰省斂事稍南臨
河有坊曰引祥橋其東則北閘口曰洪應殿曰壇城曰
轟雷軒曰嘯風室曰噓雪室曰雲雨室曰耀電室曰清
一齋曰寶淵門曰靈安堂曰精馨堂曰馭仙次曰輔國

堂曰演妙堂曰入聖居也自北閘口迤南東岸曰船屋
乃冬日藏龍舟之所有弘濟神祠橋之南亦有船屋焉
再南曰玄熙殿有馬頭左擁翠亭右飛香亭後更名曰
玄潤亭再南曰陟山門通裏氷窖者也又西馬頭曰龍
淵亭曰念善館又有玄雷居又有亭曰龍湫又有殿曰
壽源即太素殿曰正心齋曰博敬齋曰素左門曰素右
門曰隆治門曰騰瑞亭曰滋祥亭又再南巋然若山者
廣寒殿即俗云蕭后梳粧臺也

萬歷七年傾頽其中錢
多至元年號神宗亦曾

分賜輔臣張居正數枚

曰太液橋其牌坊曰堆雲曰積翠

今止存山石基

址天啟年間魏忠賢擅政又將舊砌山石俱拆毀焉

又再南曰圓殿即承光殿也

磚砌如城牆亦有雉堞以磴道分上之上有樓閣古松

松乃數百年物霜幹虬枝式如偃蓋凡枝之垂者皆以

杉木撐拄之此乾明門之西也其石梁如虹直跨金海

通東西之往來者曰玉河橋有坊二曰金鼇玉螭

萬厯年間

每遇七月十五日道經廠漢經廠做中元法事放河燈于此橋之中一空約丈餘以木枋代石亦用木欄杆橋

之東岸

再南曰五雷殿即椒園也亦名蕉園凡修實錄成

於此焚草左迎祥館右集瑞館曰太玄亭曰問法所曰
臨漪亭曰水雲榭再南則至西苑門矣由玉河橋玉熙
宮迤西曰櫺星門迤北曰羊房夾道牲口房虎城在焉
內安樂堂在焉櫺星門迤西曰西酒房曰西花房曰大
藏經廠即司禮監之經廠也又西曰洗帛廠曰果園廠
曰西安裏門曰甲字等十庫曰司鑰庫曰鴿子房街南
曰惜薪司正西則西安門也櫺星迤西街南贓罰別庫
之門也門之東迤南曰蠶池曰陽德門又西曰迎和門

則萬壽宮之門也自陽德門外皆可以至河是河也由
北安門外樂王廟西橋下入縈迴洸漾蓄洩惟謹蓮藕
魚鰕味最美其萑葦茂密水禽上下儼若江南景云冬
至河凍可拖牀以木作平板上加交牀或稿薦一人在
前引繩可拉三二人行冰如飛遇積雪殘雲景更如畫

世廟晚年尚玄修多居西內嘉靖壬寅正月十六日皇
太子自宮中往見即絕河水而過時問臣夏言詞云胡
床穩坐渡層冰即指拖床作也萬歷年間臨御既久禁
網疎濶每于河凍之後近京貧民羣來趨食即于皇城
內外凡有冰處拉拖床以餬口遇雪後林臯間拖床者
艷素相間交拉如織亦有興豪乘醉而頻往返者至春

冰將泮或間有沉溺捐生

其河自寶鈔司東與護城河之西脈合流過長安右門之北經承天門前再東過長安左門之北自湧福閣會歸于皇城之巽域而總出焉

護城河者自北開口分流經內官監白橋大高玄殿之東北上西門之外半邊石半邊磚橋入此橋半用石者防車輪耳大高玄殿前豎石碑二曰宮眷人等至此俱下車馬

世宗尊崇玄教敬恪如此

水由橋下至紫禁城牆下護城河

而東而西經太廟之東玉芝宮飛虹橋之西而西脈則

自太社太稷壇之西至靈臺寶鈔司之東總合流于湧
福閣之河焉

紫禁城內之河則自玄武門之西從地溝入至廊下家
由懷公門以南過長庚橋與馬房橋由仁智殿西御酒
房東武英殿前思善門外歸極門北皇極門前會極門
北文華殿西而北而東自慈慶宮前之徽音門外蜿蜒
而南過東華門裏古今通集庫南從紫禁城牆下地溝
亦自巽方出歸護城河或顯或隱總一脈也

神廟久不
臨御河遂

壅塞不通幫石圯泐者多是河也非謂魚泳在藻以恣
魏忠賢專政時勒令疏通

遊賞又非故為轉折以耗物料蓋恐有意外回祿之變

則此水儘可賴焉

天啟四年六科廊災六年武英殿西
油漆作災皆得此水之濟而興建皇

極等殿大工凡灰泥等項皆用
此水回想祖宗設立良有深意

且宮後苑魚池之水慈

寧宮魚池之水各立有水車房用驢拽水車由地灌以
運輸咸賴此河云

大明門內曰承天門其門裏之東一門內則太廟也西
一門內則太社太稷也曰端門內則六科也東曰闕左

門再東則松林會堆處也西曰闕右門其居中巍然而向明者午門也鐘鼓在焉旗纛在焉曰左掖門曰右掖門門之內居中向南者皇極門即承天門也俗所謂羅兒天銅壺滴漏在此其左曰弘政門即東角門也考選通政司叅議及鴻臚寺官在此焉右曰宣治門即西角門也居西向東曰歸極門即右順門也居東向西曰會極門即左順門也皇極門內居中向南者皇極殿即奉天殿也金磚玉瓦在殿額兩傍左向西者曰文昭閣即

文樓也右向東者曰武成閣即武樓也南北連屬穿堂
上有滲金圓頂者曰中極即華蓋殿也殿之兩傍東曰
中左門西曰中右門再北曰建極殿即謹身殿也俱嘉
靖四十一年重修工完所更改今名者也殿居中向後
高踞三躔白玉石欄杆之上與乾清門相對者雲臺門
也兩傍向後者東曰後左門西曰後右門即雲臺左右
門亦名曰平臺也凡召對閣臣等官或于平臺即後左
門也又東則景運門也西則隆宗門也隆宗門西向南

者仁德門也乾清門外左右金獅各一入門丹陛直至
乾清宮大殿其殿內居中向南大匾曰敬天法祖四字
則崇禎元年八月初四日懸掛係司禮監掌印高太監
時明筆也殿左曰日精門右曰月華門左小門曰龍光
右小門曰鳳彩殿之東西有斜廊廊之後左曰昭仁殿
右曰弘德殿東西各有角門宮後披簷東曰思政軒西
曰養德齋再北則穿堂居中圓殿曰交泰殿其濬金圓
頂亦猶中極殿之制也再北曰坤寧宮則皇后所居也

曰永祥門增瑞門俱萬曆二十五年二月十一日添額
宮之東披簷曰清暇居北園廊曰游藝齋俱崇禎五年
十月二十三日懸安者也宮後左曰景和門右曰龍福
門再北右曰端則門左曰基化門便接瓊苑東西門矣
坤寧宮有門原曰廣運門至嘉靖十四年七月初二日
改曰坤寧門萬曆三十三年乾清宮坤寧宮俱鼎建告
成至四十年後始御
居乾清宮西煖閣

乾清宮大殿之左向西者曰端凝殿尚冠等近侍所司
御服袞冕玉圭冠帶等錢糧貯此左向東者曰懋勤殿

天啟皇初造地炕
于此恒臨幸之

此微垣北辰深邃之處中一路之大

畧也

過日精門之東曰崇仁門稍南曰內東裕庫曰弘孝殿
曰神霄殿即舊名崇先殿也日精門在北向南曰景明
門今曰順德左門則東一長街也再北向西與龍光門
斜相對者曰咸和左門向南者曰景仁宮其東則東二
長街也南首曰麟趾門北首曰千嬰門麟趾門之東曰
延祺宮曰怡神殿再東曰嘉德左門又東則蒼震門也

此門恒閉遇埽雪修造則開

咸和左門之北向西與景和門相對者

曰廣和左門向南者曰承乾宮東宮娘娘所居也東二

長街之東曰永和宮廣和左門之北向西與基北門相

對者曰大成左門向南者曰鍾粹宮今曰興龍宮東二

長街之東曰景陽宮

孝靖皇后
曾居此

千嬰門之北並列者則

乾東之房五所其東後小門每月初四二十四日

打掃凡有事則開也宮正司六尚局皆在乾清宮之東

已上皆東一路之大畧也

過月華門之西曰膳廚門即遵義門向南者曰養心殿
前東配殿曰履仁齋前西配殿曰一德軒後殿曰涵春
堂東曰隆禧館西曰臻祥館殿門南則司禮監太監秉
筆之直房也其後層尚有大房一連緊靠隆道閣後祖
制宮中膳房也魏忠賢移膳房于怡神殿將此房亦改為秉筆直房養心殿之西
南曰祥寧宮宮前向北者曰無梁殿係世廟烹煉丹藥之處其制
一木不有皆磚石砌成者

月華門之西南歸然者隆道閣原名皇極閣後更道心

閣至隆慶四年春更此名也左曰仁蕩門右曰義平門

此二門原名會極
歸極世廟時改之

閣之下曰仁德堂

即舊名精一堂隆
慶四年春更者

前曰仁德門

萬歷二十四年兩宮災後開此門出入至
神廟晚年移居乾清宮始開不恒開也

閣之東曰忠義室閣之西南過義平門則慈寧宮矣

萬歷

年間慈聖李老娘娘所居泰昌元年八月神廟皇貴妃
鄭老娘娘亦居此神廟東宮昭妃鄭老娘娘亦居此天
啟七年八月後熹廟皇
貴妃范娘娘又居此宮

月華門往北曰順德右門則西一長街也再北向東與
鳳彩門斜相對者曰咸和右門即廣安門向南者曰毓

德宮即長樂宮萬厯四十四年冬更曰永壽宮其西則

西二長街也南首曰螽斯門北首曰北百子門螽斯門

西曰啟祥宮

神廟自兩宮災先移居于毓德宮後遂移居于此宮萬厯三十年春聖體不豫曾召

輔臣沈一貫至此宮

此宮乃獻皇帝發祥之所原名未央宮世廟

入繼大統至四十年夏特更名曰啟祥宮門內石坊向

北扁石青地金字四原曰貞源茂始後更之曰聖本肇

初向南字四原曰慶澤無終後更之曰玄德永衍再西

則嘉德右門即舊名景福門也其兩藩杆插雲向南而

建者隆德殿也舊名玄極寶殿隆慶元年夏更曰隆德

殿供安玄教三清上帝諸尊神萬曆四十四年十一月初二日被燬天啟七年

三月初二日重修崇禎五年九月內將諸像移送朝天等宮安

藏六年四月十五日更名曰中正殿東配殿曰春仁西

配殿曰秋義東順山曰有容軒西順山曰無逸齋再西

北曰英華殿舊名隆禧殿供安西番佛菩薩像殿前有

菩提樹二株婆婆可愛結子可作念珠又有古松翠柏

幽靜猶山林焉三十年秋各殿復供安聖像如前自嘉德右門之西向

南者曰二南門門之北則八角井也水不堪汲天啟六年亦曾修改而味竟不堪其廢井也再北曰四德門再

西曰咸安宮

穆廟繼選皇后陳老娘娘曾居于此天啟年間客氏曾移居之

咸和右門之北向東與隆福門相對者曰廣和右門向

南者曰翊坤宮

油宮娘娘所居

西二長街之西曰永寧宮天啟

改曰長春宮

咸妃李娘娘曾居此

廣和右門向東與端則門相對者曰大成右門向南者曰儲秀宮西二長街之西曰咸福宮百子門之東並列

者則乾西之房五所其西後小門凡有事則開如東後小門總乾清門官經管故閉也已上皆西一路之大畧也東西二小門之外皆有惜薪司貯柴炭之園備宮中進用焉

坤寧宮之後則宮後苑也欽安殿在焉供安玄天上帝之所也有門曰天一之門殿之東北有足跡二傳云世廟時兩宮回祿之變玄帝曾立此默為救火其靈跡顯佑有如此者崇禎五年秋隆德英華殿諸像俱送付朝

天等宮大隆善等寺安藏惟此殿聖像獨存未動也曰承光門曰集福門曰延和門苑內曰萬春亭曰千秋亭曰對育軒曰清望閣曰金香亭曰玉翠亭曰樂志齋曰曲流館曰四神祠曰硯花殿萬歷十一年春拆去累塚石山子券門石扁名曰堆秀山上蓋亭一座名曰御景亭東西兩邊魚池二處其東曰浮碧亭西曰澄瑞亭凡奇花異樹禽聲上下春花秋月景色可人東南曰瓊苑東門西南曰瓊苑西門即東一長街西一長街之北

首也其南首則東西夾牆也

欽安殿後坤寧門嘉靖十四年秋更名曰順貞門其宮牆外則紫禁城之玄武門每夜之更鼓在焉玄武門裏迤東有廊下家可十一門而更鼓房則儘東首為紫禁城之艮隅也

乾清宮門圍牆之內左右廊房之朝南半間者曰東夾牆曰西夾牆特制糞桶堅好仍于幫溝處以木板為牆離地二三尺開圓孔安竹筒長六七尺者十餘根為內

臣便溺免沾汚衣靴也慈寧宮西第等處皆宮眷內官便溺之所宮牆之外磚砌券門安大石于上鑿懸孔垂之各有淨車在下接盛于每月初四十四二十四日開玄武門及各小門掃之

自嘉德右門之西曰太安門其外向西曰長庚門凡放夫匠洵溝及修造或年老有勞宮人病故皆奏開此門以便出入其外自玄武門迤西可久開自北而南過長庚橋至御酒房後牆曰長連可三十一門再前層曰短

連可三門並玄武門東計之通共五十四門總曰廊下
家俱答應長隨所住各有佛堂以供香火三時鐘磬宛
如梵宮凡遇有風之日即輪挨一人大聲巡警曰謹慎
燈燭牢插線香禁地嚴慎火燭有如此各門所栽棗樹
森鬱其實甜脆異常衆長隨各以造麪做酒貨賣為生
都人所謂廊下內酒是也長庚橋南有柿樹一株高二
丈餘每至霜後柿懸樹杪丹色可愛凡文書房並司禮
監監官典簿各占過宿直房

自隆宗門外朝東者曰司禮監經廠直房日用紙劄筆墨書籍皆貯于此候御前取討過慈寧宮外層向東小門之南曰北司房即文書房也再南曰司禮監管賞處即兩班四撥寫字所居也亦有第房木桶竹簞為衆便溺之所再南曰外膳房再南曰南司房即監官典簿直房也隆宗門外朝西者亦監官典簿直房也有井存焉再南則寶寧門門外偏西大殿曰仁智殿即俗所謂白虎殿者是也凡大行帝后梓宮靈位在此停供其西南

曰御酒房西北曰馬房監官典簿奉旨問刑拷打內犯之所門外有二大椿俗云裏馬房者此也東南曰思善門門外橋西曰武英殿命婦朝皇后于此再西曰太庖廚曰尚膳監乃第一員總理及管理僉書掌司所居也武英殿之西南曰御用裏監乃把總等官所居再東曰南薰殿凡遇徽號冊封大典閣臣率領中書官篆寫金寶金冊在此

例有司禮監太監奉欽遣臨視管待御用監裏監把總管置辦盛席伺候必殺鹿一隻

雙蒸魚作羹以明豐侈此舊典也

再東曰歸極門所謂逍遙城者在六

科廊背後

此門之西南礪礪之下漢王高煦真銅缸中曾炙死于此至天啟年間鼎建大工時官匠

亦計議及此魏忠賢曰這是國家甚麼吉祥好勾當存之何為遂泯其迹今亡之矣從歸極門裏

向西南入曰六科廊東西兩房掌司所居精微科及章疏在焉過皇極門再東曰會極門凡京官上本接本俱于此處各項本奉旨發抄亦必由此處會極門裏向東南入曰內閣輔臣票本清禁處也出會極門之東礪礪下曰佑國殿供安玄帝聖像籤最靈其像金鑄成者曾經盜去鎔化惟像首屢消不化盜惟藏之甕肚內晝夜

隨身後事遂由此發露將盜置法至于寶善門思善門
乾清門仁德門平臺之西室及皇城各門皆供闕聖之
像佑國殿之東則內承運庫銀兩表裏等錢糧貯藏之
所也兩庫之間有槐一株自徽音門南望枝幹扶疎茂
翠可愛有井甘冽可用再東過一小石橋曰香庫乃內
府供用庫答應錢糧之所又稍北有庫一連坐東向西
有石碑曰古今通集庫係印綬監職掌古今君臣畫像
符券典籍貯此每年六月初六日曬晾如皇史宬例再

北曰東華門門內有石橋橋之北有樹三株曰馬纓樹
高不足丈其葉似槐而細長晝舒夜斂其花粉紅色無
瓣而皆若莖結角如椿亦可種而生是以名之曰馬纓
也再北曰馬神廟御馬監該班官及良馬十餘匹在此
有飛龍二大字太監蕭敬筆也會極門東向南者曰文
華殿也後殿扁曰二帝三王平治天下大經大法者乃
慈聖老娘娘御書後人多以為神廟御書分六行每行
二字前殿扁曰繩愆糾繆者亦慈聖老娘娘特命小臣

杜詩寫也殿內圍屏中數扇畫輿地圖左數扇貼文官

職名右數扇貼武官職名遇陞遷則更易之

此係萬歷初年輔臣

張文忠公居正所創進者至二十四年之後神廟御居啟祥宮另換一小圓屏高二丈中左右亦貼文武職名

于啟祥宮前殿安設

文華殿前後柱上對聯曰念終始典于學期

邁殷宗於緝熙殫厥心若稽周后又曰披皇圖考帝文
九寓化成于几席游禮闕翔藝圃六經道顯于羹牆又
曰四海昇平翠幄雍容探六籍萬幾清暇瑤編披覽惜
三餘又曰縱橫圖史發天經地緯之藏俯仰古今期日

就月將之益又曰西崑峙九玉之峯寶氣高騰冊府東
壁耿雙星之曜祥輝遙接書林殿之側有九五齋臨寶
室精一堂恭默室殿之後曰王食館端敬殿理辦房過
小門西北曰省愆居其制度用木為通透之基高三尺
餘下不令牆壁至地其四圍亦不與別處接連凡遇天
變灾眚聖駕居此以示修省之意殿之東曰神廚內有
一井凡每祭司井之神即于此井具儀祭之殿之西曰
崇本門殿之後曰刻漏房銅壺滴漏在此凡八刻水交

一時直殿監官抱時辰牌赴乾清門裏換之牌長尺餘
濶數寸石青地金字某時凡道途遇之者必側立讓行
坐者必起立亦敬天時之義也殿之東北向後開門者
曰聖躋殿供三皇歷代明醫御服藥餌之處也徽音門
裏亦曰麟趾門其內則慈慶宮也

神廟時仁聖陳
老娘娘居此

內有

宮四曰奉宸宮曰勗勤宮曰承華宮曰昭儉宮其園之
門曰韶圃門曰麗園門曰擷芳殿曰薦香亭麟趾門之
東曰闕雎左門其內則掌印秉筆直房所謂梨園者此

也西關睢右門再西轉角向西者曰元輝殿再北曰御

馬監直房每日伺候御乘良馬十餘匹在此

神廟時有進到大黑

牛二隻無角亦餵養于此

再北曰御用等監庫再北朝南者曰寶善

門

門之西舊有核桃棗樹數株乃二百餘年所培植者魏忠賢因天啟二年夏風變除去以便跑馬

門

內迤東曰慈慶宮後門門之外神廟末年鑿一井味極

甘洌北曰奉先殿即內太廟也街東曰隆祀門其內則

外東裕庫也街西再北曰蒼震門又街東再北並列二

門向西者曰履順曰蹈和則號殿仁壽宮之外層小門

也內有噦鸞宮喈鳳宮凡先朝有名封之妃嬪無名封之宮眷所居養老處也各有應得養贍膳銀喫穿至病終之後該號殿看門官稟知司禮監監官典簿題知奉旨著照某封某氏例發送此巷自寶善門亦可通玄武門俗稱狗灣其居中之門曰蓮花門也

景運門南朝西者都知監之直房也隆宗門北朝東者司禮監人數之直房也每夜五更攢點至曉報九刻水者刻漏房官及答應長隨也隆宗門南朝東者曰協恭

堂

慈寧宮慈慶宮皆有花園有井皆有庫藏而乾清宮兩傍之宮各有井無花園惟鍾粹宮有松數株耳

附記

京北沙河鞏華城有門四南曰扶京東曰鎮遼西曰威漠北曰展恩內有駐鑾宮曰龍蹕門曰龍蹕殿曰廣載宮東曰凝禧之殿曰華鸞宮曰集祥宮西曰景惠之殿曰翠鳳宮曰會祖宮東曰麗春門曰布和門西曰延秋

門曰宣澤門北曰寧遠門

天壽山紅門裏曰時陟門曰時陟殿曰松露殿曰肅敬殿曰修儀館曰飾容館曰聖蹟亭曰感恩門曰感恩殿曰九龍池曰粹澤亭曰老君堂曰長生蹟曰長生亭

湖廣承天府即世廟發祥之所舊名安陸州今改曰承天府即興都也曰重明門曰麗正門曰龍飛門曰龍飛殿曰啟運殿曰卿雲門曰卿雲宮曰鳳祥宮曰弘載宮曰春暉門曰秋朗門曰純一門曰純一殿曰世子府曰

泰禋門曰承配殿曰保和門曰太和門曰啟祚門曰受命御極之殿曰青霄殿曰福寧殿門曰慶源殿曰光熙門曰元佑宮門曰儲祉門曰元佑門曰元佑寶殿曰宣真殿曰衍法殿曰隆祥殿曰三洞殿

明宮史卷一

欽定四庫全書

明宮史卷二

明 呂毚 撰

內府職掌

祖訓所載設立內府衙門職掌品級間有所未及載并載而未詳者謹譜次梗概于左按內府十二監曰司禮曰御用曰內官曰御馬曰司設曰尚寶曰神宮曰尚膳曰尚衣曰印綬曰直殿曰都知又四司曰惜薪曰寶鈔

曰鐘鼓曰混堂又八局曰兵仗曰巾帽曰針工曰內織
染曰酒醋麵曰司苑曰浣衣曰銀作已上總謂之二十
四衙門也此外有內府供用庫內承運府庫等處亦臚
列于後以備考焉

司禮監

掌印太監一員秉筆隨堂太監八九員或四五員設有
象牙小牌一面長寸餘每日申時交接輪流該止凡每
日奏文書自御筆親批數本外皆衆太監分批遵照閣

中票來字樣用硃筆楷書批之間有偏傍偶誤者亦不妨畧為改正最有寵者一人以秉筆掌東廠掌印秩尊視元輔掌東廠權重視總憲兼次輔其次秉筆隨堂如衆輔馬皆穿貼裏先斗牛次陞坐蟒先內府騎馬次櫬机祿米每陞一級則歲加十二石各家私臣曰掌家職掌一家之事曰管家辦理食物出納銀兩曰上房執掌箱櫃鎖鑰曰掌班曰領班鈐束兩班答應官人曰司房打發批文書謄寫印奏文書其下則管帽管衣靴茶廚

房打聽官看莊宅皆瑣屑事務也其餘大小衙門遇有應題奏事情皆先關白司禮掌印秉筆隨堂而始行凡御前親近大內臣如乾清宮管事打外牌子其秩亦顯榮猶外庭之勲爵戚臣然皆得掌各衙門之印視其寵眷厚薄而欽傳畀之不拘資次

司禮監提督一員秩在監官之上于本衙門居住職掌古今書籍冊葉手卷筆硯墨綾紗絹布紙劄各有庫貯之選監工之老成勤敏者掌其鎖鑰所屬掌司四員或

六七員佐理之并內堂亦屬之又經廠掌司四員或六七員在經廠居住只管一應經書印板及印成書籍佛藏道藏番藏皆佐理之自提督之下則監官典簿十餘員第一員監官提督皇史宬并新房候轉提督俱輪流該止在廊下家宿專理皇城內一應禮儀刑名鈐束長隨當差聽事各役關防門禁其次六科廊掌司六員或八員分東西兩房管精微科內外章疏及內官履歷脚色職名月報逃亡事故數目其次又數十員或八員管

二十四衙門山陵等處內官級職姓名撰寫每日傳行
聖旨稽查門禁鈴束當差聽事題奏應行禮儀應頒賞
賜其次六科廊謄黃寫字一員其次管賞寫字則按節
令挨次題稟禮儀文書及賞例或百餘員或數十員分
兩班四撥各撥若干人其班按十二支輪之曰頭頂整
一日過夜曰守早從卯至申曰守晚從申至次日天明
曰末頂整一日過夜方得下班歇息四日也凡遇聖駕
朝講遊幸穿麟補紅襖襪或青襖襪執藤條攔擋者皆

掌司人數寫字者也或轉經廠司禮監掌司者則每撥
內另有一種衙門寫字共十餘員挨補而已自提督至
寫字皆穿襖襖凡出入皇城各門俱門軍接與擋道自
內書堂奉旨撥派名曰正途其次或乞恩奏保改陞者
亞馬

文書房官八員或十員職掌通政司使每日封進本章
并會極門京官所上封本及在內各衙門本天下各藩
府本府有大小濃淡之不同文書房各以名銜前後分

管之其在外之閣票在內之答票一應旨意聖諭御札

俱由文書房落底簿發行

凡御前面考隨堂秉筆自崇禎元年冬欽出事君能致其

身題考鄭太監之惠曹太監化淳中式始至十二年夏李太監承芳署司禮監印時其名下顧三聘者亟欲陞

遷遂密托已之名下王建鼎代作選於衆時文一篇被巡綽發其狀李遂不得已奏知聖上立將三聘責斃降

建鼎淨軍發南海子看守牆鋪其年秋李補職逮獄

內書堂讀書

宣德年間創始命大學士陳山教授之後以內臣任焉

凡奉旨收入

官人選年十歲上下者二三百人撥內書堂讀書本監

提督總其綱掌司分其勞學長司其細擇日拜聖人請

詞林衆老師初則從長安右門人北安門出後則由北
安門出入每學一名亦各具白蠟手帕龍掛香以為束
脩至書堂之日每給內令一冊百家姓千字文孝經大
學中庸論語孟子千家詩神童詩之類次第給之又每
生給刷印倣影一大張其背書號書判倣然判倣止標
日子號書不點句也凡有志官人另有私書自讀其原
給官書故事而已派年長有勢力者六人或八人為學
長選稍能寫字者為司房凡背書不過寫倣不堪或損

汚書做犯規有過者詞林老師批付提督責處之其餘
小字輕則學長用界方打手重則于聖人前罰跪再重
則扳著幾炷香扳著者向聖人前立彎腰用兩手扳著
兩脚不許體屈屈則界方亂打如雨或半炷香或一炷
香其人必眼脹頭眩昏暈僵仆甚而嘔吐成病者此最
酷不近理之法也

凡強凌弱衆暴寡長欺幼者每
賄托學長借公法以報私怨

諸凡

讀書官人遇節令朔望亦放學一日其每日暮臨散則
排班題詩不過雲淡風輕之類按春夏秋冬隨景而以

腔韻題畢方擺列魚貫而行誤亂攙越者必羣打詬辱之別衙門官遇學生擺列行走必拱手端立讓過即司禮老公遇之亦然凡各衙門缺寫字者即具印信本奏討奉旨撥給若干即挨名給散若已撥散將完無人讀書該監題知于二十四衙門官占官下及監工改讀書以補之

禮儀房

署在東安門外舊都府草場之東向南

提督太監一員掌印或秉

筆攝之掌司數員寫字管事數員本房長隨數員掌管

一應選昏吉禮每月春夏秋冬四仲月選乳婦生男十口生女十口月給食料在妳子府居住凡宮中有喜鋪月子房則生男生女各一二口在文華殿外西北臨河之小房住及報生皇子則用生女妳口皇女則用生男妳口彌月剪髮百日命名及請髮留髮入囊冊立冊封選妃打扒角選駙馬一應禮儀皆經理之

中書房掌房官一員散官十餘員係司禮監監工年老資深者挨轉專管文華殿中書所寫書籍對聯扇柄等

件承旨發寫完日奏進御前凡宮中糊飾如不放外匠
便只是監工并學手藝牌子糊飾挨轉此處并御前作
至貧老無依則發外經廠看守以待斃焉凡司禮監掌
印秉筆隨堂故後各有牌位送外經廠供安各有影像
送至西直關外大佛寺供安看廠監工守寺僧人侍香
火不絕也

御前作掌作官一員散官十餘員亦是監工年老資深
者挨轉專管營造龍牀龍桌箱櫃之類合用漆布桐油

銀硃等物料奏准于甲字等庫關支已上二處亦掌印
或秉筆提督之

司禮監外差南京正副守備太監二員關防一顆其文
曰南京守備內官關防護衛留都為三千里外親臣轄
南京內府二十四衙門孝陵神宮監等官奏進神帛鮓
魚苗薑等鮮各衙門印文比北京各多南京二字

孝陵神宮監掌印太監一員別衙門可陞不係司禮監
也轄本陵僉書掌司及謫南種菜淨軍人等

天壽山守備太監一員關防一顆轄十二陵掌印僉書
工部廠掌司等官凡每年清明親率各掌印來京奏添
土木每歲辦進松花黃連茶核桃榛栗等果各陵皆有
涼果廠在京

鳳陽守備太監一員關防一顆護衛皇陵轄僉書數十
員兼管高牆犯宗

湖廣承天府守備太監一員關防一顆轄僉書數十員
轄承德荆襄地方護衛顯陵徵收籽粒每年進茶扇葛

金匱要略卷二
布手巾香茶

太嶽太和山即武當山也鎮守太監一員轄均州等處
經管本山香火羽流辦進擲梅鷹嘴筍騫山茶等件
正陽等九門永定等七門正副提督太監二員關防一
顆

已上六處秩在文書房監官之上并孝陵掌印各有勅
諭

又正陽等門掌司一員秩視六科廊然
不隨內轉缺則補之近已裁革不補

大壩等馬房正副提督太監二員勅諭關防秩在文書

房之次外衙門官亦間任之

蘇杭織造太監一員亦有勅諭關防秩視秉筆

東廠

成祖即位永樂十八年始置其外署在東安門外迤北

提督太監一員關防

一顆其勅諭最為隆重凡內官奉差關防皆曰某處內官關防惟此處篆文曰欽差總督東廠官校辦事太監關防至天啟四年因避御諱改鑄官旗本廠設有掌貼刑千百戶二員掌班領班司房四十餘名圓帽皂靴穿直身十二顆管事圓帽襖襪皂靴其撞頭辦事百餘名

分子丑寅卯十二顆圓帽襖褶白靴番役可千餘名外署大廳之左小廳供岳武穆像一軸廳後磚影壁雕狻猊等獸狄梁公斷虎故事大廳之西有祠堂內供從來掌廠職名牌位前有坊曰百世流芳稍南有獄一處凡重犯則繫獄輕犯干連則在署外之店也署西面有門以通出入向南大門未嘗輕開也凡中府等處會審大獄北鎮撫司拷訊重犯本廠皆有人聽記其口詞一本搜打數一本于本日晚或次早奏進每日訪看兵部有

無進部有無塘報京城各門皇城各門關防出入俱有

事件奏聞或地方失火或雷擊何物亦奏聞之又每月

晦日奏報在京雜糧米豆油麵之價

此祖宗以來良法深意欲九重之上

覽物價之貴賤即可知農歲之豐歉以商賈之通塞便可知道路之夷塞也

凡皇城禁地人

命亦皆有事件其內署在東上北門之北街東混堂司

之南有匾曰朝廷腹心有至聖堂有井其掌殿公宮中

直房有欽給密封牙章一枚凡事件應封奏者以此鈐

封

內官監

掌印太監一員其所屬有總理管理僉書典簿掌司人數寫字監工自典簿以下分三班宮中過夜每班掌司第一人曰掌案所管十作曰木作石作瓦作搭材作土作東行西行油漆作婚禮作火藥作并米鹽庫營造庫皇壇庫裏冰窖金海等處凡國家營建之事董其役凡御前所用銅錫木鐵之器日取給焉外廠甚多各有提督等官真定府設有插印木植管理太監一員則內官

監之外差也四年一換只有本監公文無勅書關防又
寶坻縣收籽粒西湖河差大石窩白虎澗等處各有提
督俱外差也凡內外修建分封藩王府第外差須數萬
金營求方能到手領勅書關防前去工竣即回凡大行
帝后陵寢妃嬪皇子女薨逝修造墳塋及完婚修理府
第皆其職掌

御用監

掌印太監一員裏外監把總二員猶總理焉有典簿掌

司寫字監工凡御前所用圍屏擺設器具皆取辦焉有
佛作等作凡御前安設硬木庫桌櫃閣各象牙花梨白
檀紫檀烏木鸚鵡雙陸棋子骨牌梳櫳螺甸填漆雕漆
盤匣扇柄等件皆造辦之仁智殿有掌殿監工一員掌
管武英殿中書承旨所寫書籍畫扇奏進御前亦猶中
書房之于文華殿中書也

司設監

掌印太監一員有總理僉書等官如內官監而所職掌

者鹵簿儀仗圍幙褥墊各宮冬夏簾涼席帳幔雨褂子
雨頂子大傘之類事最煩苦遠不逮御用監內官如遇
御前打點庫藏擡箱則此三衙門之人皆任重擡運不
敢憚勞

御馬監

掌印太監一員有監督提督四衛勇士小廝有監官有
典簿掌司寫字拏馬等官有象房掌房等官有母象九
隻各居一房缺則奏于外象房改補金鞍作長隨房等

處有各灘監工本監象房之東有裏草欄草場皇城之

外有天師菴草場舊都府草場

天啟六年夏舊都府草場失火魏忠賢督率內

外官員軍士人等救撲三日始息

神宮監

掌印太監一員司禮監監官或文書房無力者升之有

僉書掌司十餘員在端門之左九廟在焉四孟之朔聖

駕親享之正旦節及別朔或遇日食則改卜于初五日

其餘節令祀事惟謹即外太廟也其地不許畜犬

萬曆年間

掌印杜用養一獅狝小狗最為珍愛東廠李太監訪知之指為違禁不敬聲欲奏奏用費千餘方得免

尚膳監

掌印太監一員光祿寺西門提督太監一員西華門內裏監有總理一員管理僉書掌司數員寫字監工及外牛房羊房等廠監工共百餘員而擡供養官撥子官長隨各數十員光祿寺涼樓醬房逢七等項各有監工坐家名色職掌造辦每日早午晚奉先殿供養膳品乾清宮等宮一號殿仁壽宮等宮眷月分廚料各有差等凡

有御前掌印秉筆管事牌子暖閣近侍及外之內閣文
華武英殿中書畫士卓兒銀兩咸光祿寺職掌用典簿
關防緘封每月酒飯一桌折銀十兩有奇半桌者五兩
有奇到每月晦照欽賞數目坐名頒給之凡遇大典禮
聖駕升大座則司禮監催督光祿寺備辦茶飯鐘鼓司
承應九奏之樂有所謂魚鳳烹龍者鳳乃雄雉龍則宰
白馬代之耳至如南京等處進到各樣鮮品皆屬收納
天啟以前凡聖駕每日三時所進之膳俱司禮監掌印
秉筆掌東廠者二三人輪辦之近年改由此監亦節省

意至崇禎十三年復照舊
例挨月輪辦遵祖制也

尚寶監

掌印太監一員僉書等官可數十員職掌御用寶璽勅
符將軍印信其所司者尚寶司凡所領寶璽曰皇帝奉
天之寶郊天齋醮用之曰尊親之寶上尊號用之曰親
親之寶有大小二顆與藩府用之曰誥命之寶勅命之
寶廣運之寶則用之最多也曰御前之寶則宮中庫藏
箱鎖用之曰御藥謹封則牙刻者也御藥房用之凡勅

命遠出者仍用一黃紙封套上下悉用一牙刻方寶封識之其文曰冊符出驗四方其餘寶咸王刻也凡寶皆內尚寶女官掌之遇用寶則尚寶司以揭帖赴尚寶監尚寶監請旨然後赴內司領取歲用寶三萬餘顆歲用寶色銀六十餘兩工部虞衡司辦進其餘寶璽尚多不恒用

天啟甲子冬河南巡撫關紹遣副使張夢鯨進到寶璽玉質瑩潔款制渾樸其文曰受命于天既壽

永昌似小篆不甚古角無利缺的非秦璽想是宋元時偽造者

印綬監

掌印太監一員僉書掌司數十員職掌古今通籍庫并鐵券誥勅貼黃印信圖書勘合符驗信符諸事及南京解到文武誥軸凡追奪誥命交納本監會同該科給事中中書舍人於勘合底簿內附寫為事緣由類于本監後小門之西傍河牆焚化

直殿監

掌印太監一員僉書等官數十員職掌皇極建極中極武英文華殿廷樓閣廊廡洒掃之役最勞苦冷局無大

廳公署也

尚衣監

掌印太監一員管理僉書掌司監工數十員掌造御用冠冕袍服履舄靴襪之事兵仗局之南舊監庫之北即本監裁縫匠役成造御服之袍房也又名曰西直房

都知監

掌印太監一員不甚顯貴餘者皆本監寫字長隨各有青紅執事衣服凡聖駕出朝謁廟等項在前警蹕清御

者即此監之官也手執骨朶身穿鸚鵡等補子戴平巾或官帽亦有穿圓領襖襪者其人極寒苦難以陞轉下下衙門也

惜薪司

掌印太監一員總理數十員僉書掌道掌司寫字監工數十員各外廠又數十員專管宮中所用柴炭及二十四衙門山陵等處內官柴炭每月初四十四二十四日開玄武等門放夫匠打掃淨車及擡運堆積糞壤每歲

春煖開長庚蒼震等門放夫役淘浚宮中溝渠正旦節
安彩粧凡過冬寒宮中各銅缸木桶該內官監添水奏
安鐵竈其中每日添炭以防冰凍凡宮中所用紅羅炭
者皆易州一帶山中硬木燒成運至紅羅廠按尺寸鋸
截編小員荆筐用紅土刷筐而盛之故名曰紅羅炭也
每根長尺許圍可徑二三寸不等氣煖而耐久灰白而
不爆如曾經伏雨久淋性未過盡而火氣大熾多能損
人俟令炫暈昏迷發嘔大人尚可皇子女嬰幼何堪又

宮中咸木做地平牆壁多缺土氣凡乳母畏寒皇子女
或中此毒不覺屢致斃夭不可不深為察也順天府歲
供糯米一十五石一斗永平府歲供紅棗一萬五千五
百七十斤于紅羅炭交納之廠中舊有香匠塑造香餅
獸炭又塑造將軍或福判仙童鍾馗各成對偶高二尺
許用金彩裝畫如門神黑面黑手以存炭制名曰彩粧
于十二月二十四日奏安于宮殿各門兩傍此亦歲暮
植將軍炭于門旁之遺意也至次年二月初二日仍擡

歸本廠修補裝新臨年節再安

魏忠賢擅政時各增而大之所費百倍于前

傀儡體做法高八九尺丈餘不等穿以真正綾絹紵細佩以真正弓矢兵器鬚眉直豎猛惡如生又恐無知之人戲弄損壞凡該地方近侍必明燈看守雖冰雪寒夜不敢遠離必交接明白人人敢怨而不敢言

凡隆

德等殿修建齋醮焚化之際用楊木長柴宮中膳房用馬口柴內官關領則片柴也外有北廠南廠西廠新南廠等處各有掌廠僉書監工貯收柴炭以聽關支

鐘鼓司

掌印太監一員僉書數十員司房學執官二百餘員掌

管出朝鐘鼓凡聖駕朝聖母回及萬壽聖節冬至年節
升殿回宮皆穿有補紅貼裏頭戴青攢頂綴五色絨在
聖駕前作樂迎導宮中升座承應凡每年九月登高聖
駕幸萬歲山端午鬪龍舟插柳歲暮宮中驅儼以及日
月蝕救護打鼓皆本司職掌西內秋收之時有打稻之
戲駕幸旋磨臺無逸殿等處本司扮農夫村婦及田畯
官吏徵租交納詞訟等事內官監等衙門伺候各用器
具

亦祖宗使知稼
穡艱難之意

又過錦之戲約有百回每回十餘人

不拘濃淡相間雅俗並陳全在結局有趣如說笑話之類又如雜劇故事之類各有引旗一對鑼鼓送上所粧扮者備極世間騙局俗態并閨閫拙婦騃男及市井商匠刁賴詞訟雜耍把戲等項皆其承應又御用監武英殿畫士所畫錦盃堆則名花雜果或貨郎擔則百物畢陳或將三月韶光富春山子陵居等詞曲選整套者分編題目畫成圍屏按節令安設又上元之前或于乾清宮丹陛上安七層牌坊燈或于壽皇殿安方員鰲山燈

有高至十三層者派近侍上燈鐘鼓司作樂內府供用
庫備蠟燭內官監備奇花火炮巧線盆子烟火火人火
馬之類又水傀儡戲其製用輕木雕成海外四夷及蠻
王仙聖將軍力士之像男女不一約高二尺餘止有臀
以上無下體油漆彩畫如生每人之下平底安一拘攴
用長三尺許竹板承之長丈餘濶數尺進深二尺餘深
方木池一箇錫箱不漏添水七分下用橈支起又用紗
圍屏隔之經手動機之人皆在圍屏之內自屏下游移

動轉水內用活魚蝦蟹螺蛙鰕鱔萍藻之類浮水上聖
駕升座向南則鐘鼓司官在圍屏之內將人物各以竹
片托浮水上游關玩耍鐘鼓喧闐另有一人執鑼在旁
宣白題目替傀儡登答讚導喝采或英國公三敗黎王
故事或孔明七擒七縱或三寶太監下西洋八仙過海
孫行者大鬧龍宮之類惟是暑天白晝作之猶要把戲
者耳

天啟六年以後凡御前撒科打院本有鐘鼓司僉
書王進朝綽號王瘤子者抹臉詼諧公然稱讚惜

薪司怎樣軫恤商人內府庫怎樣米積天堆東廠怎樣
釐奸剔弊寶和店怎樣裕國通商內修朝殿外鎮邊疆

或稱好個魏公公或誇好
個魏太監聖顏每為喜悅
其人物器具御用監也水池

魚鰕內官監也圍屏帳幔司設監也大鑼大鼓兵仗局
也

寶鈔司

掌印太監一員管理僉書十餘員掌司監工數十員每
年工部商人辦納稻草石灰木柴若干萬斤又香油四
十五斤以為膏車軸之用抄造草紙豎不足二尺濶不
足三尺各用簾成一張即以獨輪小車運赴平地類總

入庫每歲進宮中備宮人使用至于皇上所用草紙則係內官監紙房抄造淡黃色綿軟細厚裁方可三寸餘進交官淨近侍收非此司造也

神廟至天啟惟市買杭州好草紙用之祖宗時

造鈔印板及紅印聞其在庫中貯埋其衙門左臨河後倚河有泡稻草池而每年池中濾出石灰草渣三百餘年陸續堆積竟成一卧象之形名曰象山有作房七十二間各具一竈突朝天名曰七十二凶神凡空間地土最宜種蔬今畦園綿亘桔槔相聞若田家清野之象云

混堂司

掌印太監一員僉書監工數員職司沐浴堂子惜薪司

月給柴薪內官監撥有夫役令事皆廢弛凡內官皆于皇城外有堂子之佛寺內沐浴有未選中的淨身男子俗稱無名白即古之私白者為之擦澡討賞該寺僧擅其利而無名白分其餘潤故內官全不來司沐浴也

銀作局

掌印太監一員管理僉書數員寫字監工數十員專管造金銀銀鐸針及挑杖金銀錢金銀豆葉等豆者圓珠重一錢或三五分不等豆葉則方片其重亦如豆不拘

其數以備欽賞之用又造花銀每錠十兩不等止可八成許又祖宗舊制有票兒銀重十兩五兩三兩二兩一兩至一錢之方塊其色止有六七成上有分兩印子

魏忠

賢時久廢不造止以細絲銀鑿賞之失祖宗節省之意矣

浣衣局

掌印太監一員僉書等數十員惟此署不在皇城內在德勝門之西俗所稱漿家房是也凡宮人年老及有罪退廢者發此局居住內官監例有供給米鹽待其自斃

以防漏洩大內之事法至善也

天啟七年十一月
客氏嘗死於此

兵仗局

掌印太監一員管理僉書十餘員軍器庫提督一員掌
關防掌司一員掌司寫字監工數十員職掌成造刀鎗
鈎戟鞭斧盔甲弓矢各樣大小神器又火藥局一處屬
之宮中元山上鰲山頂之燈例點放神器三位則監工
事也凡每年七夕宮中乞巧小針并御前鎖鑰鎚錐針
剪之類及日月蝕救護鑼鼓響器宮中做法事鐘鼓鐃

金史卷之八十二
卷二
鉞法器皆隸之是以亦稱為小御用監也

巾帽局

掌印太監一員管理僉書掌司監工數十員職掌內官
長隨內使小火者平巾官帽每年入夏據現在員數具
題移文工部至冬初即于節慎庫領銀十餘萬兩給散
內官內使人等靴料凡有羨餘繳進御前凡新陞秉筆
即送朝衣冠笏帶鞋一分凡選中駙馬中使之家正帽
閣者之猪嘴帽插柳跑馬勇士之員帽藩王之國其旗

尉靴帽帶若干分皆本局造送之奏上於工部文領工

價

其署後臨河有梓潼帝君廟傳云神像是順流漂入至此不動遂建祠祀之籤最靈

針工局

掌印太監一員餘與巾帽局同職長內官長隨內使小火者冬夏衣每年遞散一次遇辰年戌年冬散鋪蓋銀一次凡宮中做法事揚幡桌圍等件皆隸焉凡內官曾賜蟒衣退出宮及病故者各具本交還本局收

內織染局

掌印太監一員總理僉書掌司寫字監工數十員掌染造御用及宮內應用緞疋絹帛之類有外廠在朝陽門外澣濯袍服之所又有藍靛廠在都城之西亦本局之外署也

萬歷三十六年始建西頂娘娘廟于此其地素窪下時都中有狂人倡為進土之說凡男女不論貴賤筐擔車運或囊盛馬馱絡繹如織以徵福焉甚而處女美婦藉此機會以恣遊觀咸坐二人小轎懷中抱一土袋香紙以往進之殊可笑也

酒醋麵局

掌印太監一員管理等官與別局相若也職掌內官宮

人食用酒醋麪糖諸物浙江等處歲供糯米小麥黃豆及穀草稻皮白麵有差以備御前宮眷及衙門內官之用與御酒房不相統轄

司苑局

掌印太監一員管理等官同前職掌宮中諸處蔬果及種藝之事歲用黑豆穀草山東等處歲供之御前所用瓜菜茶料俱此局與林衡等上林苑海子同辦之

已上總謂之二十四衙門惟浣衣局在皇城之外

也

內府供用庫

掌印太監一員總理管理僉書掌書寫字監工共百餘員專司皇城內二十四衙門山陵等處內官食米每員每月四斗有油庫蠟庫等處廳前懸木魚一尾長可三尺許以示有餘糧之意也凡御用白蠟黃蠟沉香等香皆取辦于此庫其印非九重倚毗最有寵眷者不得掌也司禮監掌印掌東廠秉筆管事牌子等歲賜祿米各

於季冬給散之宮中各長街設有路燈以石為座銅為樓銅絲為門壁每日晚內府庫監工添油點燈以便巡

視關防

魏忠賢擅政盡行廢弛以便實行毋敢言者

司鑰庫

掌印太監一員管理僉書寫字監工可數十員凡寶源局等處鑄出制錢該部進交本庫備御前取討賞賜之

用庫中積有歷代古錢洪武以來大錢

魏忠賢時導帝濫賜左右幾無

可通凡乾清等門及午門東華門等門鑰匙皆本庫監工

於五更三點時自宮中發出分啟各門其鑰即便繳回其印文曰司闔庫印俗名曰天財庫

內承運庫

掌印太監一員近侍僉書太監十餘員掌司寫字監工數十員其署在東下馬門其職掌庫藏在宮內者曰內東裕庫曰寶藏庫皆謂之裏庫其會極門寶善門迤東一帶及南城磁器等庫者皆謂之外庫也凡金銀紗羅紵絲閃色織金錦羊羖玉帶內塊象牙瑪瑙寶石珍珠

珊瑚之類總隸之又浙江等處每歲夏秋麥米共折銀一百一萬有奇即國初所謂折糧銀今所謂金花銀是也候解到京于每季仲月由長安右門入經進本庫交收此印及直殿監印鐘鼓司混堂司印靈臺印皆本衙門第一員僉書挨掌不係貴近內臣掌至崇禎三年冬便改以貴近內臣掌也凡內官陞玉帶即于本庫領取及褫降病故仍具本交還南京供應機房太監一員則本庫外差有勅諭關防所謂漢府織造是也其署漢庶

人高煦遺址

靈臺

掌印太監一員近侍僉書數員看時刻近侍三十餘員
學習數十員凡遇收選宮人則撥三四十名年幼者讀
步天歌陰陽雜法天官星厯等書習寫算觀星氣輪流
上臺以候測變畀呈稟掌印具呈司禮監掌印據實奏
聞其占候書曰觀象玩占曰流星撮要等書皆抄謄授
受不敢傳布于外世雖有抄本玩占多差訛不全未足

信也其教法極嚴比司禮監書堂之學較勝云每年歷樣造厯係靈臺欽天監公同經管

御酒房

提督太監一員僉書數員專造竹葉清等各樣酒并糟瓜茄惟乾豆豉最佳外庭不易得也

牲口房

提督太監一員僉書數員收養異獸珍禽有虎城羊房

彈子房

掌房一員僉書數員專備彈弓所用泥彈大小輕重各有等第以黃布作袋盛之

刻漏房

官十數員不隸靈臺專管每日時刻晝則文華殿後每一時至即令直殿監官入宮換牌每夜攢點後至天明則隆宗門外報九刻水之第一聲而答應長隨接報第二聲如某時初一至初四某時正一至正四之類為接班起早之候也

更鼓房

凡有罪內臣謫司其事挨年久者一員予牌帽總之平
中烏木牌者數人佐之餘者曰二牌曰定水牌子其餘
則淨軍每夜五名輪流上玄武門樓打更每夜自一更
三點起至五更三點止按數目用藤條擊鼓用檀木榔
頭擊點點者銅鑄之大雲板也例則一更一人上樓不
許攜燈晴夜尚可惟風雨晦冥苦不可言如有錯誤即
責處之

甜食房

賞房內官一員協同內官數十員經手習學造辦虎眼等糖栽松減煤等樣一切甜食于內官監取討餞金盒粧盛進安御前兼備進賜各宮及欽賜閣臣等項其造法器具皆內官自行經手絕不令人見之是以絲窩虎眼糖外廷最為珍味又七月十五日進獻波羅蜜亦所造也

綠作

即洗白廠

掌作內官一員協同內官數十員經手習學織造各色
兜羅絨各色五毒等絛花素勒甲板絛及內官長隨小
火者牌總絛惟兜羅絨織法傳自西域外毋敢私織者
甜食房并此廠皆屬內御用監轄最寒苦可憫

裹草攔草場

在皇城內東北隅御馬監大門之南永樂初年建收料
豆至宣德年間將中府草場之草分授始立場有倉廩
也

中府草場

即舊都府草場

在東安門外奴子府街永樂初創收御馬草傳云是勝國時都督府故名

天師菴草場

在皇城外東北角正統年間以張天師舊處改建故名牆外有井甘冽可用不減十王府街之井也

已上共謂之三場隸御馬監各有掌廠太監一員貼場一十二員僉書數十員或百餘員

甲字庫

職掌銀硃烏梅靛花黃丹綠礬紫草明礬光粉黑鉛水
膠槐花藍靛五倍子潤白三梭布苧布棉木紅花水銀
礪砂藤黃茜草薑黃蜜陀僧礪砂白芨梔子百藥煎之
類皆浙江等省歲供納之以備上用等監奏准討取

乙字庫

職掌奏本紙藥榜紙中夾等紙各省解到胖襖以備各
項奏准取討

丙字庫

每歲浙江辦納本色絲綿合羅絲串五色荒絲以備各項奏討而山東河南順天等府歲納棉花絨則內官之冬衣軍士之布花咸取給于此

丁字庫

每歲浙江等處辦納生漆桐油紅黃熟銅白蘇蘇麻黃蠟錫牛筋黃牛皮麂皮鐵線魚膠白員藤生熟建鐵以備御用監內官監等處奏准支給

戊字庫

職掌河南等處解到盔甲弓箭刀及廢鐵以備奏准支給

承運庫

職掌浙江四川湖廣等省黃白生絹以備奏討欽掌夷人并內官冬衣樂舞生淨衣等項用

廣盈庫

職掌黃紅等色平羅熟絹玄色等色杭紗及青紬綿布

以便奏討

廣惠庫

職掌綵織帕梳櫬則刷錢鈔錠之類以備取討

廣積庫

職掌盆淨焰硝熟硫黃聽盔甲廠等處成造火藥凡京營春秋操演咸取給于此

贓罰庫

職掌沒官衣物等件或作價抵俸給官

已上總謂之曰十庫各有掌庫一員貼庫數員僉書數十員不等然十庫自戊之後不全用十干者已者已也止也是以不得不改用別名也

漢經廠

皇城內舊設有漢經廠內臣若干員每遇收選宮人則撥給數十名習念釋氏諸品經懺其持戒與否則聽人自便如遇萬壽聖節正旦中元等節于宮內啟建道場遣內大臣瞻禮揚旛挂榜如外之應付僧人一般其僧

伽帽袈裟緇色衣亦與僧人同惟不剃髮耳事畢焚化

圓滿後仍各易內臣服色

神廟時曾選經典精熟心行老成持齋者數員宮女數十

人亦能于各宮佛前作法事行香念經若尼姑然

番經廠

習念西方梵唄經呪宮中英華殿所供西番佛像皆陳設近侍司其燈燭香火其隆德殿欽安殿香火亦各有陳設近侍者凡做好事則懸設旂榜惟此番經廠仍立監齋神于門傍本廠內官皆戴番僧帽穿紅袍黃領黃

護腰一永日或三晝夜圓滿掃砂萬歷時每遇八月中
旬神廟萬壽聖節番經廠雖在英華殿做好事然地方
狹隘須于隆德殿大門之內跳步叱而執經誦念梵唄
者十餘人粧韋馱像合掌捧杵向北立者一人御馬監
等衙門牽活牛黑犬圍待者十餘人而習學番經跳步
叱者數十人各戴方頂笠穿五色大袖袍身披纓絡一
人在前吹大法螺一人在後執大鑼餘皆左持有柄圓
鼓右執彎槌齊擊之緩急疎密各有節奏披五色方位

魚貫而進視五方五色傘蓋下誦經者以進退若舞馬
跳三四个時辰方畢監齋神者傀儡體製法真盔甲器
械高與人等猶門神馬黑面豎鬚靈威可怖于本衙門
宮門安之凡做好事畢即收于本殿庫中凡食驢肉者
絕不敢入殿入則必有意意外灾咎凡食牛犬肉者亦不
敢入隆德殿欽安殿亦頗著靈驗人不敢犯也英華殿
前菩提樹二株結子可作念珠詞臣張士範偈謹附載之
其序曰

大內西北之隅建有英華殿一處殿前菩提樹
二株間係九蓮菩薩慈聖皇祖母所植高二丈

枝幹婆娑下垂至地儼若佛菩薩慈悲接引衆生也者
盛夏開花作黃金色鼻觀時時有異香葉如椒子不從
花得乃生于葉之背雙雙若綴明珠似借空花喻世幻
起色香佛果別成非關生滅特現菩提身而為說法者
秋深葉墮時飄颻永巷拾作念珠較南產者惜不甚大
然色黃潤而分瓣之線色微白名曰多寶珠如得未曾
有神廟以聖母上賓奉御容于樹之東北別殿值朔望
令卽親詣行禮每仰瞻雙樹若有梧捲之思焉因上尊
號九蓮菩薩云偶禪友特以此珠作施備述其詳如此
臣士範故作小偈以代頌言曰英華殿前菩薩樹淨土
移來飽霜露借問當年種者誰植以九蓮菩提故托根
不與凡卉同花作黃金欲迎風婆娑蔭覆人天界馥郁
香飄帝釋宮香飄蔭覆起塵劫培得本枝千萬葉明珠
每葉實離離佛子繩繩相續接秋深貝葉滿塔鋪會得
西來意旨無分明舍利人恣取綴作人間念佛珠念茲
在茲指其掌拳拳弗失非闕想常將法雨潤心田澆灌

菩提日日長果証三生不記春化作菩提萬億身萬億
之身一身是九蓮菩薩寧異人是則名為慈聖母九品
蓮花為上首即心即母即菩提菩提不朽母不朽菩提
即母足承歡誰道衆生見母難寄語恒河諸佛子莫把
菩提作樹看翰林院
侍講臣張士範恭識

道經廠

習演玄教諸品經懺建醮做好事亦于隆德殿欽安殿
懸幡掛榜如外之羽流服色而雲璈清雅恍若仙音

已上共謂之曰三經廠每遇收選官人各撥數十
人隸之凡做好事一永日或三晝夜或五晝夜七

晝夜各有欽賞錢錠為禩一總事畢易服叩頭謝
恩凡三經廠將做好事之前預頒旨意傳各衙門
答應錢糧其所誦經卷所費紙劄司禮監也桌欂
香爐等件內官監也鈴杵等件御用監也旂桌圍
針工局也拜單幃幙傘司設監也香燭油米內府
供用庫也炭餅柴火惜薪司也齋供飲食尚膳監
也鐘磬鐃鈸兵仗局也

南海子

總督太監一員關防一顆提督太監四員管理僉書掌
司監工數十員分東西南北四圍每面方四十里總二
十四鋪各有看守牆鋪牌子淨軍若干人東安門外有
菜廠一處是其在京之外署也職掌壽鹿獐兔菜蔬西
瓜果子凡收選內官于禮部大堂同欽差司禮監監官
選中時由部之後門到廠過一宿次晨點入東安門赴
內官監又細選無違礙者方給烏木牌候收畢請萬壽
山前撥散

林衡署 蕃毓署 嘉蔬署 良牧署

提督太監一員各有掌署官一員貼署僉書數員職掌
進宮川芎雜菜栽培樹株雞黃鴨蛋小菜等項

織染所

掌關防太監一員僉書十餘員職掌內承運所用色絹
其署向南德勝門內三座橋之北內有空地堪為園圃
其染成之絹赴內承運庫交納此所亦有監督有所大
使有供辦顏料諸項商人此所不隸內織染局

盔甲廠

即鞍轡局

建署于都城之東南隅掌廠太監一員貼廠僉書數十員轄匠頭九十名小匠若干名專管營造鐵盔甲銃礮

弓矢火藥之類

萬厯年間火藥忽燃者再其三十三年九月丙申申時忽響一聲起烟如靈芝

燒死京營藥把總等官九員軍人六十三名重傷者二十一名燬房屋若干間崇禎甲戌九月初七日天明時忽響一聲損房屋人甚多將置火藥石礮遠拋于泡子河城牆下又一石礮自空中落一民家屋上打透至炕而炕上所卧小孩不知何因在地無恙又一人擊挂于梁上頭與脚下垂止有皮無衣無肉骨比生時頗長許多有一吳羊兒者素以食物入廠貨賣此日已擔入忽覺眼黑耳畔畧聞有些微響聲移時始醒開眼視之則

身立泡子河橋上不知得何神佑而無恙也又有一賣肥皂者素在崇文門裏賣後改于門外賣是時偶入城索債被響震死于姜百戶門首肥皂箱油粉狼籍見者無不悚懼奉旨將掌廠直日內臣賀堯年等監督主事蔡宸恩逮獄簿懲之

安民廠

舊名王恭廠

建署于都城之西南隅掌廠太監一員貼廠僉書十餘員轄匠頭六十名小匠若干名管營造錢糧與盔甲廠同

墳陵

西山墳陵景皇陵皇太子墳王墳公主墳各有掌官一員僉書十餘員不等以供修理洒掃看守香火凡有祭祀即本處掌府庫行禮

京城內外寺廟

大護國隆善寺等寺朝天宮等宮東嶽廟等廟各有燒香內官十餘員不等及東西捨飯寺亦各有內官十數員咸因年老有病退居于此止存本身柴火冬衣靴料以終天年此祖宗以來養之澤周詳備至者也

安樂堂

在北安門內掌房官一員掌司數十員凡在裏內官長
隨內使小火者有病送此處醫治痊可之日則重謝房
主銷假供職如不幸病故則各有送終內官啟銅符出
北安門內官監給棺木板惜薪司給焚化柴擡至淨樂
堂焚化

淨樂堂

在西直門關外亦有內官數人經管凡宮女內官無親

屬者死後于此焚化堂有東西二塔塔下有智井皆盛貯骨灰之所猶唐之宮人斜也

天啟七年客氏
笞死于此焚屍

內安樂堂

在金鰲玉螭橋西櫺星門迤北羊房夾道有掌司總其事者二三十人凡宮人有病及年老或有罪先發此處待年久方再發外之浣衣局也

成化年間憲廟皇貴妃
萬娘娘專寵孝穆皇后

紀娘娘覺有孕曾託病居此
誕生孝廟為中興聖帝云

內贊禮官

附巡街長隨

凡宮中祭祀禮儀等事係掌禮官職掌如外之鴻臚寺
馬其官十餘員自答應長隨選其動轉便利聲音洪亮
儀表豐秀者為之得穿紅圓領束金鑲帶此外又有巡
街長隨亦自答應長隨內歷俸實挨戴平巾得穿青襖
襖牙牌各輪流巡歷地方有旗尉數人跟隨凡禁地有
異言異服及喧嚷犯禁者得詰而責之事大則開具連
七紙手本名曰事件呈稟司禮監奏處事小則責打逐
出而已

答應長隨

凡收入官人之始先選身軀偉壯有力者百餘人分派大轎即轎頂方轎也小轎即明轎也并傘扇等演習步驟凡遇謁廟朝講以至聖駕出外擡弓箭賞賜等箱駕回各交原處俱在玄武門之東西長庚門之外一帶廊下家住分各門共繫屬司禮監轄平巾牙牌貼裏看守六科廊報水巡街禮儀房等項皆從此中挨陞補選凡夜間那方有光亮便從宮中門縫傳出急分差長隨遍

尋是何處失火登時回奏凡召對宣官及欽賜大臣銀兩
表裏羊酒瓜果等項皆長隨齎送天下文武官員各藩府
進到表箋禮物皆長隨收接捧進其為首數員有官帽曰
答應牌子即司禮監奉御然不敢穿襪襪也

官下 官占

分兩班四撥小火者烏木牌平巾遇升一級則內使烏
木牌雲宮中洒掃之時有力者勉之

當差聽事

兩班四撥內使小火者烏木牌平巾有總牌一名二牌
三牌四牌各一名每撥餘者各數十名專答應司禮監
監官典簿人數凡出票拏人馬房動刑裏外聽事房看
守墩鎖淨軍皆其職掌猶外廷之皂隸也夜則輪流叫
火巡風隔門縫聽傳驅使極勤苦忙迫可憐

此等內官
間多騙詐

嫖賄貪忍無恥亦
與外廷所役相似

京城內外十六門

正陽門掌門官一員管事官數十員帶管外羅城南面

居中之永定門凡冬至聖駕恭詣園丘郊天并耕籍田皆由于此

崇文門掌門官一員管事官數十員帶管外羅城之東南左安門正東之廣渠門東北之東便門崇文門即俗稱海岱門也左安門即俗稱礮門也廣渠門即俗稱沙窩門也

宣武門掌門官一員管事官百餘員帶管外羅城西南之右安門正西之廣寧門西北之西便門宣武門即俗

稱順城門也廣寧門即俗稱彰義門也此京城之南一面也東面則朝陽門即俗稱齊化門也聖駕春分躬詣朝日壇及藩王之國則由此門出再北則東直門也西面即阜城門即俗稱平則門也聖駕秋分躬詣夕月壇則由此門出再北則西直門也北面居西者德勝門也聖駕謁陵及大行帝發引則出此門北面居東者曰安定門也凡遇夏至聖駕恭詣方澤壇祭地即經由此門也各掌門官一員管事官十餘員或三四十員與前三

門亦同稽查出入交納課程

已上俱聽正副提督掌司節制而司禮監鈐轄之
凡在京大小喪柩得于安定西直東直阜城崇文
宣武門發引餘三門不許喪柩出也

在京府第

王府每承奉正副二員典寶等官數十員公主府每中
使一員閤者數十員聖駕御前凡每日親近內臣自司
禮監掌印秉筆隨堂之次而名位尊顯者曰乾清宮管

事其第一員或第二員則提督兩司房者也曰打卯牌子則隨朝捧劍者也其次曰御前牌子曰煖殿則朝夕在側者也其次曰管櫃子曰人數司房曰管賞司房曰御藥房曰御茶房曰管庫又其次曰管弓箭曰駕馬曰尚冠等四執事則并尚衣尚履管淨者也曰帶刀曰報時刻曰大庖廚曰宮後苑曰班上曰吹響器曰欽安殿曰隆德殿英華殿之陳設已上皆穿紅謂之曰近侍也曰某宮近侍則答應皇后妃嬪皇子女等近侍也各數

十員不等總穿紅近侍也

御藥房

提督太監正副二員分兩班餘曰近侍二三十員未進
宮未穿紅者曰學醫官人三四十員職掌上用藥餌與
太醫院相表裏凡選一次官人進內必撥年少者三四
十人或五六十人選醫官教習讀藥性賦醫要集覽及
素問脈訣等書歷代以來無一人敢無事入藥房者防
至密也凡聖駕違和傳放御醫至日四人或六人吉服

入宮不論冬夏必于殿門之內設炭火一盆中焚蒼朮
雜香人人從盆上入叩頭畢第一人膝行跪胛左手第
二員跪診右手胛畢仍互更再胛之各將聖恙大體面
奏數言出至聖躋殿計藥開方具本御藥用金罐煎進
之其罐口于御藥謹封緘焉

御茶房

秩視御藥房分兩班有牌子四員常行近侍三四十員
職司茶酒瓜果凡聖駕出朝經筵講筵御用茶及宮中

三時進膳聖駕七箸中宮七箸係其職掌尚膳監撥長
隨以供汲水擡扛厯代以來亦無一人敢擅入者

篋頭房

近侍十餘員專習為皇子皇女請髮留髮入囊整容之
事凡誕生皇子女彌月剪胎髮百日命名後按期請髮
者即如外之每次剃頭然一根不留如佛子焉皇子戴
玄青縐紗六瓣有頂圓帽名曰瓜拉冠至十餘齡留髮
約年餘又擇吉入囊總束于後冬用玄色紵夏用玄色

紗作囊濶二寸許長尺餘垂于後至選婚有妃始擇吉
行冠禮此皇子事也皇女戴寸許濶小頭箍至十餘齡
留髮約年餘又擇吉行扒角至選婚有駙馬始擇吉上
頭此皇女事也凡奏文書皆禮儀房職掌凡收生婦醫
婦進宮出宮或乳婦有疾更換皆禮儀房事也

猫兒房

近侍三四人專飼御前有名分之猫皇心所鍾愛者亦
加升管事職銜壯者曰某小厮驕者曰某老爹牝者曰

某丫頭侯有名封則曰某管事或直曰猫管事亦隨中

官數內關賞

凡皇子女嬰孺時多有被猫
叫得驚風薨夭有誰敢言

宮內教書

選二十四衙門多讀書善楷書有德行無勢力者任之
三四員五六員不拘穿襖襪不妨原衙門原職銜而隨
御司房或管櫃子關賞以洊升玉帶騎馬仍命秉筆一
員提督之所教宮女讀百家姓千字文孝經女訓女字
經女誡內則大學中庸論語等書學規最嚴能通者升

女秀才升女史升女官正司六局掌印凡聖母及后妃
禮儀等事則女秀才為引禮贊禮官也凡宮人有罪者
發落責處墩鎖或罰提鈴等名色以苦之提鈴者每日
申時正一刻并天晚宮門下鎖時及每夜起更二更三
四更之交五點則自乾清門裏提至日精門回至月華
門仍還乾清宮門裏其聲方止提者隨行正步大風大
雨不敢避而鈴聲若四字一句如曰天下太平天下太
平云

寶和等店

經管各處客商販來雜貨一年所徵之銀約數萬兩除正項進御前外餘者皆提督內臣公用不係額設內府衙門之數也店有六曰寶和曰和遠曰順寧曰福德曰福吉曰寶延而提督太監之廳廨則在寶和店也俱坐落戎府街凡奉旨提督者亦無勅書傳云起自嘉靖年間裕邸差官徵收神廟屬慈寧宮聖母李老娘娘宮中徵用按每年販來貂皮約一萬餘張狐皮約六萬餘張

平機布約八十萬疋粗布約四十萬疋棉花約六千包
定油河油約四萬五千簍燒酒約四萬簍而都城內所
燒者不與也荊油約三萬五千簍芝麻約三萬石草油
約二千簍南絲約五百駄榆皮約三千駄各香鋪分用
也北絲約三萬斤串布約十萬筒江米約三萬五千石
夏布約二十萬疋瓜子約一萬石醃肉約二百車紹興
茶約一萬箱松羅茶約二千駄雜皮約三萬餘張大麩
約五十萬塊中麩約三十萬塊麵麩約六十萬塊京城

自造細麴六十萬塊而內臣勲戚自製之麴不與也四
直河油五十簍四直大麴二十萬塊玉約五十斤猪約
五十萬口羊約三十萬隻俱各有稅而馬牛驢驘不與
也如滇粵之寶石金珠鉛銅砂汞犀象藥材吳楚閩越
山陝之幣帛絨貨又不與也



明宮史卷二